

佛言祖语

问曰：五波罗蜜相即是般若波罗蜜相不？若是般若波罗蜜相，不应五名差别；若异，何以故言欲行檀波罗蜜当学般若波罗蜜？答曰：亦同亦异。异者，般若波罗蜜名观诸法实相故，不受不著一切法；檀名舍内外一切所有，以般若波罗蜜心行施，是时檀得名波罗蜜。复次，五波罗蜜殖诸功德，般若波罗蜜除其著心邪见；如一人种谷，一人芸除众秽，令得增长果实。成就余四波罗蜜亦如是。

问曰：今云何欲行檀波罗蜜当学般若波罗蜜？答曰：檀有二种：一者净，二者不净。不净者，憍慢故施，作是念：劣者尚与，我岂不能？嫉妒故施，作是念：我之怨憎施故得名，如是胜我；今当广施，要必胜彼。贪报故施，作是念：我施少物，千万倍报，是故布施。为名故施，作是念：我今好施，为人所信，好人数中。为摄人故施，作是念：我今施之，人必归我。如是等种种杂结行施，是名不净。净施者，无是杂事，但以净心，信因缘果报，敬愍受者，不求今利，但为后世功德。复有净施，不求后世利益，但以修心，助求涅槃。复有净施，生大悲心为众生故，不求自利早得涅槃，但为阿耨多罗三藐三菩提。是名净施。以般若波罗蜜心故，能如是净施，以是故说欲行檀波罗蜜当学般若波罗蜜。复次，般若波罗蜜力故，舍诸法著心，何况我心而不舍？舍吾我心故，身及妻子视如草土，无所恋惜，尽以布施。以是故说欲行檀波罗蜜当学般若波罗蜜。余波罗蜜亦皆如是，以般若波罗蜜心助成故。